



UNIVERSITÄTS-  
BIBLIOTHEK  
PADERBORN

## Universitätsbibliothek Paderborn

### Conciliorvm Omnivm Generalivm Et Provincialivm Collectio Regia

Ab anno DCCCCX. ad annum MLXXIII.

**Parisiis, 1644**

Epistola III. Leonis Papae IX. Ad Thomam Episcopvm Africanvm. Ostendit  
Carthaginensem archiepiscopum totius Africae esse primatem:  
Gummitanum vero episcopum sine illius consensu nec episcopos ...

**urn:nbn:de:hbz:466:1-15625**

eo, si potuerit, pacifice diffiniat, aut in præsentiam nostram vtraque pars examinanda veniat, salua sibi interim per omnia & patriarchali reuerentia, & proprietate sua. Quod si extra feceritis, sententia canonica super vos vigilabit.

## EPISTOLA III.

## LEONIS PAPÆ IX.

AD THOMAM EPISCOPVM AFRICANVM.

Ostendit Carthaginensem archiepiscopum totius Africae esse primatem: Gummitanum vero episcopum sine illius consensu nec episcopos consecrare, nec prouinciale Concilium conuocare posse: solius autem Romani pontificis esse & episcopos deponere, & generalia Concilia indicere.

*Leo episcopus seruus seruorum Dei Thomæ confratri carissimo  
& coepiscopo salutem.*

CVM ex venerabilium Canonum auctoritate recolimus ducentos quinque episcopos Concilio interfuisse Carthaginensi, & nunc a tua fraternitate audimus, quinque vix episcopos superesse in tota Africa, vtique tertia huius corruptibilis mundi parte, compatimur tantæ vestræ imminutioni totis visceribus animi. Cum autem ipsas Christianitatis reliquias ediscimus interna & mutua dissensione discindi & dispergi, & aduersus se inuicem zelo & contentione principatus inflari, nil aliud nobis primo dicendum occurrit, quam illud sancti Amos vatis: *Parce, Domine, parce obsecro: quis suscitabit Iacob, quia paruulus est?* Sed quamuis in tali tantoque defectu religionis plurimum doleamus, multum tamen gaudemus, quia sanctæ Romanæ ecclesiæ matris vestræ sententiam requiritis & expectatis super quæstionibus vestris: & quasi riuulis ab vno fonte erumpentibus, & in suo se cursu per diuersa spargentibus, ad ipsius fontis primam scaturiginem reuerti debere optimum putatis, vt inde resumatis directionis vestigium, vnde sumpistis totius Christianæ religionis exordium. Noueris ergo procul dubio, quia post Romanum pontificem primus archiepiscopus & to-

tius Africæ maximus metropolitanus est Carthaginensis episcopus: nec quicumque sit ille Gummitanus episcopus, aliquam licentiam consecrandi episcopos vel deponendi, seu prouinciale Concilium conuocandi, habet sine consensu Carthaginensis archiepiscopi, cuiuslibet dignitatis aut potestatis sit, exceptis his quæ ad propriam parochiam pertinent: cetera autem, sicut & alii Africani episcopi, consilio Carthaginensis archiepiscopi aget. Vnde carissimi confratres nostri & coepiscopi Petrus & Ioannes recte sentiunt de Carthaginensis ecclesiæ dignitate, nec consentiunt errori Gummitanæ ecclesiæ. Hoc autem nolo vos lateat, non debere præter sententiam Romani pontificis vniuersale Concilium celebrari, aut episcopos damnari, vel deponi: quia etsi licet vobis aliquos episcopos examinare, diffinitiuam tamen sententiam, absque consultu Romani pontificis, vt dictum est, non licet dare: quod in sanctis Canonibus statutum, si quæritis, potestis inuenire: quamuis enim omnibus generaliter apostolis dictum sit a Domino: *Quæcumque ligaueritis in terra, ligata erunt & in cælo: & quæcumque solueritis in terra, soluta erunt & in cælo*; tamen non sine causa specialiter & nominatim dictum est beato Petro apostolorum principi: *Tu es Petrus, & super hanc petram ædificabo ecclesiam meam: & tibi dabo claves regni cælorum*. Et in alio loco: *Confirma fratres tuos*. Scilicet, quia omnium ecclesiarum maiores, & difficiliore causæ per sanctam & principalem beati Petri sedem a successoribus eius sunt diffiniendæ. Iam quia ad interrogata etiam confratrum nostrorum Petri & Ioannis episcoporum decreuimus respondere, optamus vt sanctam tuam fraternitatem iugiter inuigilantem vtilitatibus sanctæ catholicæ ecclesiæ, deuote pro nobis orantem, sancta & indiuidua Trinitas semper conseruet, carissime frater.

Datum xvi. Kalendas Ianuarii, anno domini Leonis papæ IX. quinto, indictione vii.